

Istorgia da l'Uniun sovietica

■ En Russia è l'Emprima Guerra mundiala ida a fin anticipadamain cun la Revoluziun d'october dal 1917. L'imperiaristic, il davos reschim autocratic da l'Europa, è vegnì remplazzà suenter ina guerra civila tras ina republica da cussegls. Partind da la teoria da Lenin duva sa sviluppar en Russia l'emprim stadi socialistic; suenter sia mort ha Stalin però transfurmà quel en ina dittatura totalitara. Dapi la mort da Stalin han ins bain inizià in process da destalinisaziun, ma è a medem temp intervegnì cun la forza



cunter revolutas en ils stadiis alliads (t.a. il 1953 a Berlin ed il 1956 a Budapest). Ed a l'entschatta

dals onns 1960 han la construcziun dal Mir da Berlin (1961) e la Crisa da Cuba (1962) marcà la culminaziun da la Guerra freida. Ils proxims decennis duevan esser segnads d'ina politica da detensiu e da mantegniment da la pussanza. E pervi da la stagnaziun economica en il bloc da l'ost è la direcziun da l'Uniun sovietica stada sfurzada il 1985 d'inziar ina midada dal curs: Il nov secretari general dal biro politic, Michail Gorbatschow, ha instradà in program da refurma che steva sut il motto da perestroika e glasnost. Il 1989 è la finala crudà il Mir da Berlin ed il 1991 è er l'Uniun sovietica sa schliada. Chatta.ch preschenta – a basa dal «Lexicon d'istorgia per l'instrucziun en classas da la maturitad bilingua» (2003) – intgins chavazzins che tractan las differents fasas da svilup da l'Uniun sovietica.

Da las revoluziuns enfin Lenin

Duma da l'imperi: Represchentanza dal pievel autorisada dal zar russ suenter la revoluziun dal 1905 enfin la revoluziun dal 1917. Ella n'aveva quasi nagins dretgs politics.

Cussegls: Oriundamain concept per ina furma da la democrazia, en la quala tut ils abitants participeschan directamain a l'execuziun ed a la controlla da la pussanza. Il model da la democrazia dals cussegls vegn chapì sco cuntermodel da la democrazia represchentaniva: ils cussegls uneschan en sasez la pussanza legislativa, executiva e giudicativa; ils cussegliers elegids èn responsabels directamain visavi il pievel electoral, èn obligads da render quita a quel, e lur reelecziun po da tut temp vegnir refusada. Istoricamain sa furman ils cussegls surtut en periodas transitoricas revoluzionaras, sco en Germania il 1918 u en las revoluziuns russas dal 1905 e 1917. En l'Uniun sovietica èn ils cussegls sovietics però prest daventads instruments da pussanza da la partida communistica.

Bolschevissem: È en il senn pli vast il medem sco communissem. Il num deriva da «bolschewiki» (ils maioritars), ils aderents socialistics radicals da Lenin en Russia ch'eran sa decidids il 1903 per Lenin e sia tactica revoluzionara. Tenor la teoria da Lenin dovra ina partida revoluzionara in'avantgarda che po far valair in dretg da comando politic. Ils bolschevists (e pli tard la partida communistica) vesevan sasezs sco partida da cader, vul dir sco organisaziun structurada severamain da surengiu che surpiglia en tut las gruppas da la societad (sindicats, unions da giuventetgna, da cultura etc.) funcziuns da cader per motivar las massas respectivamain las educar al socialissem. En l'Uniun sovietica ha cunzunt Stalin restructurà la partida, il stadi e la societad tenor quest princip da cader.

Partida da cader: Cunzunt partidas communisticas che scoleschan ed elegian sistematicamain lur funcziunaris per tut ils secturs. Sco criteris per il cader valan fidaivladad ideologica, submissiun assoluta a la partida e qualificaziun professiunala. Il cader furma l'elita da la partida. En ils stadiis communistics vegnivan tut ils caders impurtants manads en la nomenclatura dal comité central e liads d'ina vart stretgmain als manaders da la



Parada dal prim da matg a Moscau il 1964.

FOTO: THOMAS TAYLOR HAMMOND / CC BY-SA 4.0

partida e da l'autra vart separads da la populaziun.

Imperialissem social: Noziun furmada da Lenin per quellas parts da la democrazia sociala europeica che sustegnevan durant l'Emprima Guerra mundiala mingamai l'atgna regenza naziunala ed eran damai, tenor Lenin, sa mess da la vart imperialistica.

Marxissem-leninissem: Svilup dal marxissem a l'ideologia communistica impegnativa tras Lenin e per part Stalin suenter la Revoluziun d'october dal 1917. Las basas centralas dal marxissem-leninissem èn: stimaziun da l'imperialissem sco stadi suprem (e final) dal chapitalissem, il bolschevissem, la dittatura dal proletariat sco stadi revoluzionar transitoric.

Comintern: Abreviazion per «internaziunala communistica». Alleanza internaziunala, surtut da partidas communisticas, fundada il 1919 sin iniziativa da Lenin. La finamira era ina revoluziun mundiala ed il stabiliment d'ina dittatura dal proletariat. Dapi il 1924 era la Comintern sutmesssa per gronda part als interess da la politica exteriura sovietica e vegniva dirigida da la Partida communistica da l'Uniun sovietica. Dissolvi il 1943 a favur da l'alleanza da l'Uniun sovietica cun las pussanzas dal vest.

NEP: Abreviazion per «Nowaja ekonomicheskaja politika» («Nova politica economica»). Perioda da 1921 fin circa 1928 da la politica economica ed interna da l'Uniun sovietica cun metodas orientadas plitost a l'economia dal martgà, per exempel commerzi intern relativamain liber, investiziuns da chapital exteriuras, commerzi e mastergnanza en mauns privats. La finamira da

la NEP era da surmontar la situaziun economica catastrofala en l'Uniun sovietica suenter la guerra civila. Ella ha effectua en general in augment economic considerabel, senza dentant accelerar l'industrialisaziun dal pajais.

L'era da Stalin (1922–1953)

Stalinissem: Noziun che designescha l'urden statal e social ch'è sa furmà sut la regenza da Stalin ils onns 1920 e 1930 en l'Uniun sovietica. Sa basond sin l'apparat centralistic dal stadi e da la partida, era quel caracterisà d'oppressiun dictatorica, terror e cult da persona. Suenter il 1945 è quest princip er vegnì applitgà sin ils stadiis da l'ost. Suenter la mort da Stalin il 1953 ha cumenzà ina «destalinisaziun» precauta, ma senza bandunar ils principis fundamentals dal stalinissem. Tras la politica da refurma iniziada dapi il 1985 da Michail Gorbatschow, sut l'ensaina da perestroika (transfurmaziun) e glasnost (avertada sociala), è il stalinissem alura vegnì surmuntà plaun a plaun.

Collectivisaziun: Transferiment dals meds da produziun privats, cunzunt dal terren agricul, en possess comunabel ed administrà sco cooperativa, surtut en l'Uniun sovietica suenter il 1927 (colcosas) ed en ils stadiis dal bloc da l'ost suenter il 1945, per exempel cooperativas agriculas en la Republica democratica tudestga. Cuntrari a la socialisaziun na va la proprietad betg en possess dal stadi.

Faschissem social: Pled da cumbat communistic per inditgar la democrazia sociala. La democrazia sociala ed il faschissem vegnivan damai considerads sco «frars schumellins» ed ils socialdemocrats sco «inimis principals» dals communistis, inimis ch'ins stueva cumbatter. La teoria dal

faschissem social è vegnida sviluppada il 1924 da Grigorij J. Sinowjew e dogmatizada il 1928 da Stalin.

Sistem Stachanow: Program da concorrenza pratitgà l'emprim en l'Uniun sovietica, pli tard er en auters stadiis communistics, il qual definiva la vita da lavur cun prestaziuns d'accord ed augment da las normas. Il sistem va enavos sin l'exempel dal lavurer A.G. Stachanow ch'aveva surmuntà il 1935 ses duair da lavur per 1300 pertschient.

Cominform: Abreviazion per il biro d'infurmaziun da las partidas communisticas e dals lavurers, fundà il 1947 sin iniziativa da Stalin. Commembers eran la partida communistica da l'Uniun sovietica e las partidas communisticas da la Jugoslavia (fin il 1948), Bulgaria, Pologna, Rumania, Ungaria, Tschechoslovachia, Frantscha ed Italia. Schlià il 1956 entaifer il process da la destalinisaziun.

Trotzkissem: Ina teoria marxistica che va enavos sin Leo Trotzki (1879–1940), la quala cuntegna l'idea d'ina revoluziun permanenta, il mantegniment da l'internazionalissem dals lavurers e la critica da la burocratisaziun stalinistica dal pajais. En l'Uniun sovietica ed en auters stadiis communistics num pegiurativ per moviments opposiziunals da la sanestra en general.

Revoluziun permanenta: Concept revoluzionar marxistic sviluppa da Leo Trotzki, tenor il qual la revoluziun dals lavurers sto sa sviluppar en in process permanent ad ina societad socialistica en direcziun d'ina revoluziun mundiala. Trotzki era da l'idea che la revoluziun en Russia saja periclitada, sch'ella na sa derasia betg er sin ils stadiis europeics e nordamericans. Cun quest concept s'opponiva el a la teoria stalinistica che la

furmaziun d'ina societad socialistica sa laschia accumplir en in singul pajais.

Tranter destalinisaziun e novas confruntaziuns

Tenda da fier: Denominaziun politica creada dal primminister britannic Winston Churchill il 1945 che definescha las mesiras prendidas da l'Uniun sovietica per segirar ses domini visavi il vest en la fasa iniciala da la Guerra freida.

Democrazia populara: Atgna denominaziun per la furma da stadi realisada suenter la Segunda Guerra mundiala sut l'influenza sovietica en ils pajais da l'Europa Centrala e da l'Ost. Auter ch'en l'Uniun sovietica devi en las democrazias popularas bain pliras partidas; quellas dastgavan dentant candidar be sin inaglista unitara e stuevan sa sutmetter al comando da la partida communistica. Facticamain existiva damai in stadi d'ina partida; i na deva nagina separaziun da las pussanzas e nagin'opposiziun.

Patg da Varsovia: Pact d'agid amical e militar dals pajais dal bloc da l'ost, concludi il 1955 tranter l'Uniun sovietica, Pologna, Tschechoslovachia, Ungaria, Rumania, Bulgaria, Republica democratica tudestga (dapi il 1956) ed Albania (fin il 1968). Davent dal 1958 devi a Moscau in comando superiur uni. Il pact obligava ils pajais communistics a l'agid militar vicendaivel. En realitad era il pact primarmain in instrument da l'Uniun sovietica per controlar l'Europa da l'Ost.

Ductrina da Breschnev: Tesa formulada il 1968 che signifitgescha la suveranitat restrenschiada dals stadiis socialistics en cas d'in privel per la «cuminanza socialistica». Ella vala sco emprova da Breschnev da giustifitgar l'occupaziun dal Patg da Varsovia e la politica d'intervenziun sovietica en la Tschechoslovachia.

Pat atomar: Inditgescha la situaziun tranter ils Stadiis Unids e l'Uniun sovietica che sa bloccavan vicendaivlamain sin tut ils plauns militars, perquai che ni ina ni l'autra vart pudeva inziar in'acziun strategica senza excluder il privel d'era destruir sasezza.

Gorbatschow e la fin da la Guerra freida

Glasnost: Dal russ «glasnyj» («public, avert a la publicitad»). Devisa politica dal program da refurma da Michail Gorbatschow (secretari general da la Partida communistica da l'Uniun sovietica 1985–1990) che dueva propagar l'avertadad e la trasparenza sociala. La finamira era in'avertura democratica dal pajais, surtut ina trasparenza dals process, per furmar la voluntad en la partida ed en il stadi cun agid da las medias. La trasparenza dueva gidar ad eliminar il burocratissem, la corrupziun ed autras mancanzas.

Perestroika: Term russ per «restructuraziun». Devisa politica dal program da refurma da Gorbatschow che propagava la restauraziun da la vita economica e sociala. Las refurmas duevan sa drizzar cunter la corrupziun ed il dischurden economic, surtut en l'administraziun economica e statala, ed avevan en mira ina meglra effizienz e dapli responsabladad individuala. Planisà era medemamain, sper ina democratisaziun pli ferma, d'introducir en l'economia elements da l'economia da martgà.

Maisa radunda: Num per las discussiuns fatgas en ils stadiis dal bloc da l'ost tranter las regenzas e l'opposiziun instituzionalmain betg prevesida (sa radunavan en Pologna enturn ina maisa radunda); ed il 1989/90 en la Republica democratica tudestga ina sort parlament u cussegl communal da cumpensaziun enfin las elecziuns libras il mars respectivamain matg 1990.



Michail Gorbatschow (a sanestra) ed il president american Ronald Reagan segnan contracts da discharmament (1987).

FOTO: PD

La presentaziun:
Dossier «Uniun sovietica».

Dapli infurmaziuns:
chatta.ch/?hiid=3631
www.chatta.ch